



REPUBLIKA E SHQIPËRISË
ENTI RREGULLATOR I ENERGJISË

Bordi

VENDIM

Nr. 132, Datë 07.06.2018

MBI

**MIRATIMIN E DRAFT KONTRATËS TIP PËR SHIT-BLERJEN E ENERGJISË
ELEKTRIKE NDËRMJET SHOQËRISË SË PRODHIMIT TË ENERGJISË
ELEKTRIKE/KESH SH.A, AKSIONET E SË CILËS KONTROLLOHEN
PLOTËSISHT OSE PJESËRISHT NGA SHTETI DHE FURNIZUESIT TË
SHËRBIMIT UNIVERSAL PËR PERIU DHËN 01.01.2018 – 31.12.2018**

Në mbështetje të neneve 16 dhe 20 gërma “h” të Ligjit nr. 43/2015, datë 22.05.2003, “Për Sektorin e Energjisë Elektrike”; neneve 5 dhe 14 të VKM nr. 244 datë 30.03.2016 “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, i ndryshuar dhe nenit 26 të “Rregullores për Organizimin, Funksonimin dhe Procedurat e ERE-s”, miratuar me vendimin e bordit të ERE-s, nr. 96, datë 17.06.2016, bordi i ERE-s, në mbledhjen e tij të datës 07.06.2018, mbasi shqyrtoi relacionin e përgatitur nga Drejtoritë Teknike në lidhje me miratimin e “Kontratës për shitblerje të energjisë elektrike ndërmjet shoqërisë së prodhimit të energjisë elektrike, aksionet e së cilës kontrollohen plotësisht ose pjesërisht nga shteti/ KESH sh.a dhe Furnizuesit të Shërbimit Universal, për periudhën kohore 01.01.2018 – 31.12.2018”,

Konstatoi se:

- Këshilli i Ministrave ka miratuar vendimin nr. 244 datë 30.03.2016 “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, i ndryshuar me VKM. 729 datë 08.12.2017.
- Në nenin 14 të VKM nr. 244 date 30.03.2016, parashikohet se: *Këto rregulla do të shërbejnë si model i përkohshëm për funksionimin e tregut të energjisë elektrike, deri në miratimin e Modelit të Tregut të Energjisë Elektrike, në përputhje me Ligjin nr. 43/2015 “Për sektorin e energjisë elektrike”. Enti Rregullator i Energjise brenda 60 ditëve nga hyrja në fuqi e këtij vendimi, të miratojë aktet përkatëse për zbatimin e detyrimeve të përcaktuara në këto kushte.*
- ERE me shkresën nr. 186/4 Prot., datë 02.03.2018, u ka kërkuar shoqërive KESH sh.a dhe OSHEE sh.a të bëjnë me dije ERE-n mbi dispozitat në draft – kontratën tip për

shit-blerjen e energjisë elektrike ndërmjet shoqërisë së prodhimit të energjisë elektrike/KESH sh.a, aksionet e së cilës kontrollohen plotësisht ose pjesërisht nga shteti dhe Furnizuesit të Shërbimit Universal për periudhën 01.01.2018 – 31.12.2018, për të cilat nuk gjejnë dakortësinë respektivisht të dyja kompanitë dhe ka kërkuar dhënien e argumentave ligjor përkatës.

- Shoqëria OSHEE sh.a në vijim të korrespondencës së sipërcituar të ERE-s, ka përcjellë në ERE shkresën nr. 3998/1 Prot., datë 06.03.2018, me anë të së cilës kërkon fillimin e mënjëhershëm të procedurës për të konkluduar me nënshkrimin e kësaj draft – kontrate e cila do të zgjidhte mosmarrëveshjet e krijuara mes dy shoqërive KESH sh.a dhe OSHEE sh.a.
- OSHEE sh.a në shkresën e saj shprehet se pavarësisht korrespondencave të vazhdueshme me KESH sh.a mbeten akoma të pazgjidhura pikat kyçe të saj që kanë të bëjnë me nomimimet dhe penalitetet dhe konkretisht Neni 4 “*Të drejtat dhe detyrimet e Blerësit*”, Neni 5 “*Të drejtat dhe detyrimet e Shitësit*” dhe neni 9 “*Zhdëmtimet/Kompensimet.*”
- KESH sh.a me shkresën e protokolluar në ERE me nr. 186/7 Prot., datë 07.03.2018, ka përcjellë në ERE draft – kontratën tip për shit-blerjen e energjisë elektrike ndërmjet shoqërisë së prodhimit të energjisë elektrike/KESH sh.a, aksionet e së cilës kontrollohen plotësisht ose pjesërisht nga shteti dhe Furnizuesit të Shërbimit Universal për periudhën 01.01.2018 – 31.12.2018.
- Sipas KESH sh.a mungesa e marrëveshjes për të krijuar një praktikë normale ndërveprimi ndërmjet shoqërive shtetërore në përmbushje të detyrimeve për shërbimin publik siç parashikohet në legjislacionin në fuqi është rrjedhojë e një qasjeje pozitive të munguar nga ana e shoqërisë OSHEE sh.a për të njohur dhe pranuar parashikimet e akteve nënligjore që rregullojnë veprimtarinë e licencuar në sektorin energjitik. Ajo që ka bërë të pamundur nënshkrimin e kësaj marrëveshje sipas KESH sh.a ka të bëjë me faktin se shoqëria OSHEE sh.a mban qëndrimin se, KESH sh.a duhet të ndjekë profilin e ngarkesës së klientëve fundorë dhe të plotësojë sasinë sipas këtij profili.
- Në vijim të sa më sipër, ERE pasi analizoi të dy draftet e përcjella nga shoqëritë KESH sh.a dhe OSHEE sh.a, me vendimin nr. 57, datë 09.03.2018, filloi procedurën për miratimin e draft – “Kontratës tip për shit – blerjen e energjisë elektrike ndërmjet shoqërisë së prodhimit të energjisë elektrike/kesh sh.a, aksionet e së cilës kontrollohen plotësisht ose pjesërisht nga shteti dhe Furnizuesit të Shërbimit Universal/OSHEE sh.a për periudhën 01.01.2018 – 31.12.2018.”
- Në vijim të kësaj vendimarrje ERE me shkresën nr. 258 Prot., datë 15.03.2018 ka kërkuar komente dhe opinione nga MIE, në lidhje me këtë fillim procedure, dhe më shkresën nr. 256 Prot., datë 13.03.2018, ka kërkuar komente dhe opinione nga Autoriteti i Konkurrencës dhe OST sh.a., dhe i ka përcjellë këto shkresa për dijeni pranë KESH sh.a dhe OSHEE sh.a.
- Nga ana tjetër kjo draft – kontratë në datën 20.03.2018, i është dërguar në rrugë elektronike edhe USAID, për marrje mendimi.
- Në përfundim të afatit të pritjes së komenteve nga palët e interesit, nuk rezultoi të ketë asnjë të tillë.

- Nisur edhe nga rëndësia e këtij akti, ERE në datën 30.03.2018, në mbështetje të neneve 27 dhe 29 të “Rregullave të Organizimit, Funksionimit dhe Procedurave të ERE”, të miratuara me Vendimin e Bordit nr. 96, datë 17.06.2016, zhvilloi një seancë dëgjimore mes përfaqësuesve të ERE, OSHEE sh.a., KESH sh.a, OST sh.a, MIE dhe Autoritetit të Konkurrencës, në të cilën u diskutua mbi draftet e përcjella nga palët dhe gjetjen e dakortësisë mes tyre.
- Gjatë diskutimeve në seancë u parashtrua se mosdakortësitë midis palëve konsistonin kryesisht në përmbajtjen e neneve 2, 4, 5, 9 dhe 14. Pas debateve të zhvilluara në këtë seancë palët arritën të dakortësojnë për programet Mujore dhe Javore të energjisë elektrike. Nga ana tjetër në përfundim të seancës dëgjimore, Autoriteti i Konkurrencës u shpreh se kjo kontratë nuk bie në kundërshtim me Ligjin nr. 9121, datë 28.07.20103, “Për mbrojtjen e konkurrencës”, i ndryshuar. Ndër të tjera palëve në seance i’u kërkua të paraqesin me shkrim pranë ERE dakortësitë që u arriten nga seanca dëgjimore me ndërhyrjen e MIE dhe mosdakortësitë, në mënyrë që ERE të vijojë me shqyrtimin dhe miratimin final të kësaj praktike.
- Në vijim të sa më sipër, në ERE në datën 30.03.2018, kanë mbërritur komentet e USAID mbi këtë draft – kontratë, të cilat kryesisht u morrën në konsideratë dhe u reflektuan në nenet e shqyrtuara nga ERE.
- Nga ana tjetër edhe MIE me shkresën nr. 5106/1 Prot., datë 10.04.2018, ka përcjellë në ERE mendimin e saj mbi këtë draft – kontratë duke rekomanduar marrjen në konsideratë të standarteve më të mira ndërkombëtare dhe ato të aplikuara deri tani, në kuadër të marrëveshjeve të furnizimit me energji elektrike të lidhura ndërmjet KESH sh.a dhe OSHEE sh.a duke garantuar sigurinë e furnizimit të konsumatorëve dhe kushte të drejta që balancojnë intersat e palëve so dhe mbrojtjen e interesave të klientëve fundorë gjatë përmbushjes së detyrimit të shërbimit publik nga ana e dy shoqërive.
- Në vijim të sa më sipër ERE pasi analizoi të dy draftet e përcjella nga shoqëritë, si dhe duke marrë në konsideratë rekomandimin e MIE dhe ato të USAID, paraqiti për shqyrtim në Bord në mbledhjen e datës 30.04.2018, këtë praktikë. Në këtë mbledhje shoqëria OSHEE sh.a kërkoi shtyrjen e trajtimit të kësaj praktike, për arsye se kërkoi edhe njëherë konsultimin me palët e treta të draftit të përpunuar nga ERE. Bordi i ERE e pranoi kërkesën e OSHEE sh.a për trajtimin e saj pas konsultimit me palët e treta.
- Në vijim me shkresën nr. 6972/1 Prot., datë 05.06.2018 **“Ministria e Infrastrukturës dhe Energjisë kërkon që në çdo rast, dispozitat kontraktore të parashikojnë të drejta dhe detyrime bazuar në livrimet dhe konsumet reale të energjisë elektrike, në përputhje me parashikimet e nenit 76, të Ligjit nr. 43/2015, “Për sektorin e energjisë elektrike””**.
- Për gjithë sa më sipër ERE pasi analizoi të dy draftet e përcjella nga shoqëritë, si dhe duke marrë në konsideratë rekomandimin dhe kërkesën e MIE dhe komentet e USAID konkludoi si më poshtë për nenet e mosdakortësuara nga palët; 2, 4, 5, 9 dhe 14:

Neni 2 “Sasia e Kontraktuar”, nga ana e ERE u pranua versioni i KESH sh.a për arsye se, i bën të mundur shoqërisë KESH sh.a, të ketë një planifikim për sasinë e tepërt të energjinë elektrike, në mënyrë që të ndjekë procedurat e shit-blerjes së kësaj sasive energjie në tregun e hapur.

Pika 3 e shtuar në këtë nen ka përmbajtjen si më poshtë:

- 3. Blerësi, brenda afateve të përcaktuara nga Shitësi, është i detyruar të konfirmojë mbi mundësinë që ka për të pranuar energjinë e ofruar nga Shitësi sipas parashikimeve në pikën 2. Ne rast se Blerësi, brenda afateve të përcaktuara nga Shitësi, nuk konfirmon mbi mundësinë që ka për të pranuar energjinë e ofruar nga Shitësi sipas pikës 2, oferta quhet e refuzuar.*

Neni 4 “Të drejtat dhe detyrimet e blerësit”:

Pika 1: duke marrë në konsideratë komentin e USAID në lidhje me këtë përcaktim i cili vjen në zbatim të legjislacionit, si dhe rekomandimin e MIE, mbi adaptimin nga ERE të standarteve më të mira Europiane, ERE në referim edhe të kontratës së EFET e cila përmban programin ditor, ka pranuar versionin e OSHEE sh.a, por duke hequr fjalinë e fundit nga kjo pikë. Pika 1 e nenit 2 është riformuluar si më poshtë:

- 1. Blerësi do ti paraqesë shitësit programet mujore/javore/ditës në avancë me bazë orare/ngarkesës për klientët fundorë në përputhje me parashikimet e akteve rregullatore ne sektorin e energjise elektrike dhe sipas formatit të parashikuar në lidhjet e kësaj kontrate.*

Pika 2, ERE pranoi versionin e KESH sh.a për arsye se, vjen në frymën e “Rregullave të Përkohshme të Tregut Shqiptar të Energjisë”, sa i përket mënyrës së parashikimit të ngarkesës dhe i mundëson KESH sh.a një planifikim dhe menaxhim sa më optimal për prodhimin e energjisë elektrike. Në përmbajtjen e kësaj pike është bërë një saktësim në mënyrën e të shprehurit të ditëve... Në përmbajtjen e kësaj pike u shtua fjala “*kalendarike*” pas togfjalëshit “*jo më vonë se 7 ditë...*”. Ky saktësim u bë në referencë të Ligjit nr. 43/2015, “*Për sektorin e Energjisë Elektrike*”, i ndryshuar dhe Kodit i Transmetimit.

Përmbajtja e kësaj pike është si më poshtë:

- 2. Blerësi jo më vonë se 7 ditë kalendarike përpara fillimit të muajit të livrimit do t’i dërgojë Shitësit gjithë të dhënat që lidhen me parashikimin e ngarkesës për muajin pasardhës me bazë javore/ditore të ngarkesës.*

Pika 3, u pranua versioni i KESH sh.a duke konsideruar faktin se një konceptim i tillë ekuilibron interesat e palëve për të bërë planifikimin dhe mundëson që KESH sh.a të planifikojë operimet përkatëse për energjinë që ngelet jashtë programit javor të OSHEE sh.a. Gjithashtu përcaktimi i ditës së mërkurë, për dërgimin e të dhënave që lidhen me parashikimin, është në referencë edhe të standarteve të ENTSO-E, për parashikimin e ngarkesës.

Përmbajtja e kësaj dispozite konsiston si më poshtë:

- 3. Blerësi jo më vonë se dita e mërkurë e çdo jave, do ti dërgojë Shitësit gjithë të dhënat që lidhen me parashikimin e ngarkesës së klientëve fundorë për javën në avance me bazë ditore/orare të ngarkesës.*

Pika 4, hiqet nga përmbajtja e nenit 4 versioni i OSHEE sh.a me përmbajtje si më poshtë:

- 4. Blerësi brenda afateve të përcaktuara nga Shitësi është i detyruar të pranojë ose jo sasinë shtesë të ofruar nga shitësi mbi programin e konfirmuar javor.*

Kjo dispozitë u hoq nga përmbajtja e nenit 4, pasi kjo situatë ka gjetur zgjidhje në nenin 2 pika 3, të kësaj kontrate.

Pika 5, afati i përcaktuar në këtë pikë u vendos ora 11.00, duke qënë se ai i përcaktuar nga OSHEE sh.a në orën 13.00, përkon me “*gate closure*” nga ana e OST sh.a (sipas përcaktimeve të Rregullave të Tregut) dhe nuk mundëson kohën e mjaftueshme për të të dy palët në kontratë që të konfirmojnë programet përpara mbylljes së portave.

Pika 6, me përmbajtje si më poshtë:

- 6 Në qoftë se shuma e programeve ditore të nominuara nga Blerësi është më e madhe se sa shuma e programeve ditore të nominuara nga Shitësi, atëherë Blerësi do të kompesohet financiarisht nga Shitësi me kostot e sigurimit të kësaj difference deri në nivelin e sasive të dakortësuara ne Nenin 5 pika 2”,*

Kjo pikë hiqet nga përmbajtja e nenit 4 për arsye se VKM nr. 244, datë 30.03.2016, i ndryshuar, (neni 5 pika 3), nuk e përmban një parashikim të tillë.

Neni 5 “Të drejtat dhe Detyrimet e Shitësit”

Pika 1: pranohet versioni i KESH sh.a për të mundësuar një shfrytëzim sa më racional të energjisë së prodhuar nga KESH sh.a, dhe kryesisht për rastet e mbiprodhimit nga KESH sh.a. Për plotësimin e kësaj dispozite ERE ka shtuar një fjali në fund të saj, si dhe është pranuar shtesa e bërë nga USAID. Shtesat paraqitur me **Bold**.

Pika 1, e riformuluar si më poshtë:

- 1. Shitësi do të livrojë dhe blerësi do të pranojë sasinë e energjisë elektrike të konfirmuar nga shitësi për blerësin sipas parashikimeve në pikën 2, 3 dhe 4, **ose sasinë e rëna dakort me shkrim midis Shitësit she Blerësit. Në rast se nuk do të ketë dakortësi midis palëve, atëherë do të jetë programi i konfirmuar nga shitësi ai që do të zbatohet.***

Pika 2, është pranuar versioni i KESH sh.a, për arsye se, kjo dispozitë vjen në frymën e “Rregullave të Përkohshme të Tregut Shqiptar të Energjisë”, sa i përket livrimit, dhe konfirmimit të programeve. Në këtë dispozitë është shtuar pas fjalëve “5 ditë”, fjala “*kalendarike*”, në referencë të Ligjit nr. 43/2015, “*Për sektorin e Energjisë Elektrike*”, i ndryshuar dhe Kodit i Transmetimit.

2. *Shitësi, jo më vonë se 5 ditë kalendarike përpara fillimit të muajit në të cilin do të bëhet livrimi, do të konfirmojë për blerësin programet mujore/javore/ditore me bazë orare te prodhimit.*

Pika 3, u pranua versioni i KESH sh.a, pasi është konceptuar në frymën e parashikimeve të “Rregullave të Përkohshme të Tregut”, për programet dhe nominimet.

3. *Shitësi në vijim të konfirmimit sipas pikës 2, jo më vonë se dita e enjte e çdo jave, do te konfirmojë për Blerësin programet javore/ditore me bazë orare te prodhimit.*

Pika 4, pranohet versioni i KESH sh.a, duke qënë se i lë më shumë kohë shoqërisë OSHEE sh.a për një planifikim të kërkesës në shkallë më të lartë saktësie, përpara dërgimit të programeve në OST sh.a.

Pika 4, me përmbajtje si më poshtë:

4. *Shitësi, duke marrë në konsideratë konfirmimet e dërguara për muajin/javën në avancë do ti dërgojë blerësit brenda orës 12:00 konfirmimin për programin e ditës në avancë me bazë orare të prodhimit dhe do të jetë përgjegjës për realizimin e programit për Ditën në Avance.*

Pika 5, hequr nga përmbajtja e nenit duke marrë në konsideratë edhe propozimin e USAID. Gjykohët se ky është një detyrim i pa arsyeshëm vendosur për kompaninë KESH sh.a. KESH sh.a duhet të jetë përgjegjës vetëm për ofrimin e energjisë elektrike e cila vjen nga detyrimi i shërbimit universal – me çmim të rregulluar. Çdo energji elektrike e tepërt mbi këtë detyrim duhet të jetë akoma për tu livruar, por sipas çmimeve të tregut, jo me çmime të rregulluara. Në fakt, Vendimi i Këshillit të Ministrave nr. 244/2016, mbi Detyrimin e Shërbimit Publik, përmend që çdo energji shtesë që ka KESH pas përmbushjes së kërkesës së Shërbimit Universal të Furnizimit mund ti ofrohet OSHEE sh.a për mbulimin e humbjeve të shpërndarjes. Çmimi për këtë energji llogaritet në bazë të çmimeve HUPEX. Duke qënë që OSHEE sh.a dhe KESH sh.a do të kenë kontrata të veçanta për blerjen e energjisë për humbjet, kjo dispozitë nuk është objekt i parashikimeve të kësaj kontrate.

Pika 6, pranohet paragrafi i OSHEE sh.a me përmbajtje si më poshtë, por me orarin të ndryshuar nga 13.00 në 12.00, duke qënë se ora 13.00 përkon me “gate closure” nga ana e OST sikurse e kemi spjeguar edhe më sipër.

- 6 *Shitësi, duke marrë në konsideratë konfirmimet e dërguara për muajin/javën në avancë do ti dërgojë blerësit brenda orës 12.00 konfirmimin për programin e ditës në avancë me bazë orare të prodhimit dhe do të jetë përgjegjës për realizimin e programit për Ditën në Avance.*

Pika 7, hiqet nga përmbajtja e nenit si më poshtë, për arsye se VKM nr. 244, datë 30.03.2016, i ndryshuar, (neni 5 pika 3), nuk e përmban një parashikim të tillë.

7. *N.q.se shuma e programeve ditore të nominuara nga Blerësi është më e madhe se sa shuma e programeve ditore të nominuara nga Shitësi, atëherë Blerësi do të kompesohet financiarisht nga Shitësi me kostot e sigurimit të kësaj difference deri në nivelin e sasive të dakortësuara ne Nenin 5 pika 2.*

Sa më sipër përmbajtja e nenit 5 merr dhe numërtim të ri të pikave në përmbajtjen e tij si rezultat i ndërhyrjeve.

Neni 9, Zhdëmtimet/Kompensimet

Sa i përket këtij neni, ERE ka pranuar propozimin e KESH sh.a për arsye se VKM nr. 244, datë 30.03.2016, i ndryshuar, në nenin 5 pika 3 të tij trajton kompensimet, sikurse i ka pasqyruar edhe KESH sh.a në versionin e tij të nenit 9. Në fund të pikës 1 të nenit 9, ERE ka ndërhyrë duke përmirësuar përmbajtjen e dispozitës, me shtësën e reflektuar më poshtë me **Bold**.

Neni 9 sipas KESH sh.a pranuar nga ERE si më poshtë:

1. ***RASTI I MOS-PERFORMANCËS NGA ANA E SHITËSIT: Në atë shkallë që Shitësi ("Pala Livruese") nuk i konfirmon Blerësit te gjithë sasinë mujore/javore/ditore të përcaktuar në pikën 1, të nenit 2 të Kontratës por në çdo rast jo më shumë se sasia e nevojshme per furnizimin e klientëve fundorë që përfitojnë nga shërbimi universal i furnizimit dhe kjo paaftësi nuk shfaqësohet nga një ngjarje e Forcës Madhore ose nga mos-performanca e Palës tjetër, Blerësi ("Pala Pranuese") ka të drejtën e një kompensimi për sasinë e energjisë elektrike që rezulton si diferencë ndërmjet sasisë së përcaktuar në pikën 1 të nenit 2 dhe asaj të konfirmuar/nominuar sipas parashikimeve te nenit 4. Në rast se kjo sasi nuk do të plotësohet, atëherë do të kompensohet sipas nenit 5 të VKM – së nr. 244, datë 30.03.2016, i ndryshuar.***
2. ***RASTI I MOSRESPEKTIMIT NGA ANA E BLERËSIT: Në atë shkallë që programet e dërguara nga Blerësi dhe të konfirmuara nga Shitësi në lidhje me sasinë e energjisë elektrike për muajin përkatës, në përputhje me parashikimet e nenit 4 dhe 5, rezultojnë më të ulëta se sasia e parashikuar në pikën 1 të nenit 2, atëherë shitësi për efekt të llogaritjes së sasisë vjetore të energjisë elektrike në kuadër të detyrimit për shërbim publik, konsiderohet se ka përmbushur detyrimin për periudhën ne fjalë në sasinë e përcaktuar në pikën 1 të nenit 2 të kësaj kontrate.***
3. ***Në atë shkallë që programet e dërguara nga Blerësi dhe të konfirmuara nga Shitësi në lidhje me sasinë e energjisë elektrike për muajin përkatës, në përputhje me parashikimet e nenit 4 dhe 5, rezultojnë më të larta se sasia e parashikuar në pikën 1 të nenit 2 dhe kjo energji ka shkuar për furnizimin klientëve fundore ose mbulimin e humbjeve ne sistemin e shpërndarjes, atëherë shitësi konsiderohet se ka përmbushur, në po atë masë shtese, detyrimin për muajin pasardhës që i korrespondon sasisë së parashikuar në pikën 1 të nenit 2 për sasinë që ka shkuar për furnizimin e klientëve fundore, si dhe për rastin kur energjia ka shkuar për mbulimin e humbjeve ne sistemin e shpërndarjes së energjisë elektrike do ti faturojë blerësit sasinë e energjinë elektrike sipas çmimit të përcaktuar në VKM 244/2016, i ndryshuar.***

4. **Shuma e pagueshme:**shumat e pagueshme sipas nenit 9 do të faturohen dhe paguhen sipas nenit 14 (Faturimi dhe pagesa).

Neni 14 “Faturimi dhe Pagesa”, është konceptuar në referencë të kontratave të tjera të miratuara nga ERE (të tillë si marrëveshja e Transmetimit dhe Shpërndarjes, Kontratën Tip për shitblerje të energjisë elektrike ndërmjet OSHEE sh.a dhe Prodhuesve me Përparësi të energjisë elektrike” të miratuar me vendimin nr. 101, datë 23.06.2016 të bordit të ERE, i ndryshuar me vendimin nr. 147, datë 30.09.2016 të bordit të ERE), gjithashtu ky formulim reflekton edhe kekresen e MIE shprehur me shkresën nr. 6972/1 Prot., datë 05.06.2018 si në vijim:“**Ministria e Infrastrukturës dhe Energjisë kërkon që në çdo rast, dispozitat kontraktore të parashikojnë të drejta dhe detyrime bazuar në livrimet dhe konsumet reale të energjisë elektrike, në përputhje me parashikimet e nenit 76, të Ligjit nr. 43/2015, “Për sektorin e energjisë elektrike”**. Në këtë kuptim është shtuar edhe paragrafi 6 në nenin 14 si më poshtë:

Përmbajtja e nenit të riformuluar si më poshtë:

NENI 14 FATURIMI DHE PAGESA

1. *Blerësi brenda datës 5 të muajit pasardhës, të livrimit të energjisë elektrike, duhet të dërgojë shitësit informacion mbi sasinë faktike të energjisë elektrike shitur kllinteve fundorë që përfitojnë nga furnizimi i shërbimit universal, me qëllim sistemimin e veprimeve sipas nenit 9 të kësaj kontrate.*
2. *Shitësi do t'i dorëzojë Blerësit një faturë sipas formatit dhe standardeve që parashikon legjislacioni në fuqi, e cila paraqet sasinë totale të energjisë elektrike të livruar nga shitësi dhe konsumuar nga blerësi për Muajin kalendarik paraardhës. Paraqitja e kësaj fature do të bëhet brenda datës 10 të Muajit pasardhës të livrimit të energjisë elektrike (ose kur kjo datë është pushim zyrtar, ditën pasardhëse të punës). Krahas faturës, Shitësi do t'i dorëzojë Blerësit edhe akt-rakordimin përkatës. Nëse Blerësi nuk dorëzon brenda afatit të përcaktuar në pikën 1 të këtij neni, informacion mbi sasinë faktike të energjisë elektrike shitur kllinteve fundore, atëherë Shitësi do të lëshojë Faturën cdo date 10 të muajit respektiv, bazuar në sasinë totale të programara/konfirmuara.*
3. *Pagesa; Blerësi do t'i kryejë pagesën Shitësit kundrejt vlerës së faturës Mujore. Pagesa do të bëhet brenda 30 ditëve nga dita e njoftimit të faturës nga shitësi. Data e pagesës do të konsiderohet data që nga llogaria e Blerësit preken fondet monetare.*
4. *Vonesa në kryerjen e pagesës; Nëse Blerësi dështon në kryerjen e pagesës brenda afatit të përcaktuar në këtë Kontratë, shpërblimi për dëmet e shkaktuara si rezultat i vonesës, do të jetë sipas akteve ligjore dhe nënligjore në fuqi.*
5. *Shumat e diskutueshme; Për çdo pretendim që lidhet me saktësinë e faturës, do të jepet një shpjegim me shkrim nga Shitësi ose Blerësi dhe korrektimet në faturë do të bëhen vetëm brenda Muajit të faturuar, në të kundërt do të paguhet shuma e faturuar jo më vonë se data e afatit të pagesës dhe diferencat (shitesat apo pakesimet) nga korrektimet do të reflektohen në Muajt pasardhës.*

6. Kur dhe nëse të dhënat janë të disponueshme, e konfirmojnë se sasia e energjisë së livruar dhe të marrë, ndryshon nga sasia e energjisë së programuar për livrim, faturimet do të axhustohen brenda muajit respektiv për të reflektuar ndryshimet e devijimet midis programit dhe sasisë aktuale të livruar.

- Ndër sa u parashtruan më sipër vlen të përmendim edhe faktin se ERE ka ndërhyrë në saktësimin e “Bazës ligjore”, të përmendur në këtë kontratë nga palët.
- Në kuptim të VKM nr. 244, datë 30.03.2016, të Këshillit të Ministrave “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, i ndryshuar, i cili përcakton ndër të tjera se Kontrata e Furnizuesit të Shërbimit Universal të cilit i është vendosur detyrimi i shërbimit publik për të blerë sasinë e nevojshme të energjisë elektrike, të prodhuar nga shoqëria e prodhimit të energjisë elektrike, aksionet e së cilës kontrollohen plotësisht ose pjesërisht nga shteti, duhet të funksionojë si një marrëdhënie e rregulluar ku sasia dhe çmimi i energjisë elektrike, për qëllime të furnizimit të Furnizuesit të Shërbimit Universal, miratohet nga Asambleja e Përgjithshme e shoqërisë së prodhimit të ngarkuar me detyrimin e shërbimit publik.

Për gjithë sa më sipër, bordi i ERE :

Vendosi:

1. Të miratojë Kontratën Tip për shit – blerjen e energjisë elektrike ndërmjet shoqërisë së prodhimit të energjisë elektrike/KESH sh.a, aksionet e së cilës kontrollohen plotësisht ose pjesërisht nga shteti dhe Furnizuesit të Shërbimit Universal për periudhën 01.01.2018 – 31.12.2018. (bashkëlidhur)
2. Për periudhën 01.01.2018 – 31.05.2018, nëse sasia e energjisë së livruar dhe të marrë, ndryshon nga sasia e energjisë së programuar për livrim, faturimet do të axhustohen nga palët në këtë kontratë për të reflektuar ndryshimet e devijimet midis programit dhe sasisë aktuale të livruar brenda muajit Qershor 2018.
3. Palet deri në nënshkrimin e një kontrate midis tyre, për furnizimin me energji elektrike për periudhat pasardhese, për marrëdhënien e furnizimit me energji elektrike për qëllime të furnizimit të shërbimit universal, do të zbatojnë kontratën e miratuar nga ERE me këtë vendim.
4. Në çdo rast sasia dhe çmimi i shitjes së energjisë elektrike për qëllime të furnizimit të Furnizuesit të Shërbimit Universal, nga shoqëria e prodhimit e ngarkuar me detyrimin e shërbimit publik, është sipas VKM-së nr. 244, datë 30.03.2016, të Këshillit të Ministrave “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, i ndryshuar.

5. Drejtoria Juridike dhe e Mbrojtjes së Konsumatorit të njoftojë shoqëritë OSHEE sh.a, KESH sh.a, dhe Ministrinë e Infrastrukturës dhe Energjisë, për vendimin e bordit të ERE-s.

Ky vendim hyn në fuqi menjëherë.

Ky vendim mund të ankimohet në Gjykatën Administrative Tiranë, brenda 30 ditëve kalendarike, nga dita e publikimit në Fletoren Zyrtare.

Ky vendim botohet në Fletoren Zyrtare.